



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Atividade Mensál
Observasaun ba Parlamentu Nasionál

Abríl 2021

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
info@jsmp.tl
Facebook: www.facebook.com/timorleste.jsmp
Twitter: @JSMPtl

Tabela Konteúdu

Introdusaun	3
A. Reuniaun Plenária	3
1) 06 Abríl 2021	3
2) 20 Abríl 2021	5
Observasaun JSMP ba dikusaun alterasaun Lei OJE 2021	6
3) 21 Abríl 2021	7
4) 22 Abríl 2021	7
5) 23 Abríl 2021	8
Rekomendasaun JSMP ba alterasaun Lei OJE 2021	9
6) 27 Abríl 2021	10
Intervensaun diversu	11
Aprezentasaun informasaun anuál 2020 Ministériu Públiku	12
7) 28 Abríl 2021	13
Reuniaun Komisaun A	14
Konkluzau no rekomendasaun	17
Rekomendasaun sira	18
a) Parlamentu Nasionál	18
b) Governu.....	18

Introdusaun

Maski iha Estadu Emerjénsia no aplikasaun serka sanitária iha no konfinamentu iha Munisípiu Dili no munisipíu haat seluk, maibé atividade Parlamentu Nasionál kontinua la'ó normál no agenda sira ba reuniaun sira plenária kontinua desde liuhusi reuniaun líder bankada sira desde hodi Parlamentu Nasionál realiza reuniaun plenária iha kada semana ida dala ida. Enkuantu atividade sira Komisaun A nian hala'ó ho normál iha Kuarta no Kinta-feira tuir oráriu serbisu Komisaun nian ne'ebé regula ona iha Rejimentu Parlamentu Nasionál.

Nune'e, iha Abríl 2021, maski iha situasaun serka sanitaria, JSMP kontinua halo monitorizasaun ba atividade reuniaun sira iha plenária Parlamentu Nasionál no reuniaun ka audénsia sira Komisaun A Parlamentu Nasionál nian.

Total reuniaun plenária sira iha Abríl 2021 hamutuk dala 8 no reuniaun sira komisaun A nian hamutuk dala 2.

Iha sumáriu ne'e, JSMP sei halo deskrisaun detalladu kona-ba rezultadu sira reuniaun plenária no Komisaun A Parlamentu Nasionál nian iha Abríl 2021 nian.

A. Reuniaun Plenária

1) 06 Abríl 2021

Reuniaun plenária iha 06 Abríl 2021 hala'ó ho agenda diskusaun sira mak hanesan iha agenda antes *ordem do dia* meza lee pedidu justifikasaun falta husi deputadu sira, apresenta votu pezar ba vítima sira ne'ebé mate tanba bee sa'e, hato'ó deklarasaun política bankada parlamentár sira, deputadu sira hato'ó informasaun diversu no informasaun husi Ministru Asuntu Parlamentár no Komunikasaun Sosiál kona-ba preukupasaun sira ne'ebé deputadu sira solisita iha reuniaun sira plenária.

Parlamentu Nasionál mós liuhusi plenária fó minutu selénsiu ba eroi sira iha Masakre Igreja Likisá nian iha 06 Abríl 1999 no kontinua votasaun ba Projetu Rezolusaun Nú.6/V/3 votu pezár ba vítima sira inundasaun ka bee sa'e iha 04 Abríl 2021 ho rezultadu votasaun afavór 45, kontra 0 no abstain 0.

Votu ida ne'e hodi fó sentidu solidaridade tristeza husi Parlamentu Nasionál ba vítima sira hodi kazu inundasuan bé sa'e ne'ebé rezulta ema barak mate no barak lakon sasán no lakon família iha kalamidade públika ne'ebé akontese udan boot iha loron 04 Abríl 2021.

Alende ne'e, bankada parlamentár sira mós hato'ó sira nia deklarasaun política hodi fó sira-nia votu sentidu solidaridade no tristeza ba vítima sira inundasaun ka bee sa'e

ne'ebé rezulta ema barak mate no barak lakon sasán no lakon família iha kalamidade públika ne'ebé akontese udan boot iha loron 04 Abril 2021.

Iha intervensaun diversu husi deputadu sira, deputadu sira hotu husu no ejize ba Governu no parte seguransa sira atu fó apoiu másimu ba iha comunidade afetadu sira ho rapidamente hodi bele ultrapasa situasaun ne'ebé comunidade sira enfrenta. Deputadu sira husu ba Governu tenke foti ho lalais dados comunidade afetadu sira iha Timor laran tomak hodi bele fó resposta rápido no simultaneamente atu bele ajuda comunidade sira labele hein kle'ur ajudu sira ne'ebé Governu tenke halo imediata. Deputadu sira mós husi intervensaun forsa F-FDTL no PNTL atu apoiu serbisu protesaun sivíl ba comunidade sira afetadu nian.

Husu mós ba Governu atu rezolve comunidade sira ne'ebé lakon uma hela fatin no fornese fatin provizoriu ba comunidade afetadu sira atu hela durante sira presiza no kontinua apoiu aihan no rupa inklui nesesidade bazíku sira ne'ebé comunidade sira presiza.

Iha Governu nia resposta, simu preokupsaun deputadu sira-nian ne'ebé hato'o no dados sira kona-ba comunidade afetadu Governu kontinua foti no lista hela hodi bele fasilita Governu atu halo atuasaun iha baze bainhira fó ajudu ba vítima no sira seluk.

Iha diskusaun *ordem do dia*, deputadu sira halo debate ho Governu kona-ba pedidu implementasaun planu vasina kontra Covid-19 no mós votasaun ba pedidu prioridade no urjénsia ba Proposta Lei Nú.32/V (3^a) Primeira alterasaun ba Lei Nú.14/2020, kona-ba Orsamentu Jertál Estadu 2021.

Reprezentante Governu nian iha debate ho Parlamentu Nasionál kona-ba planu implementsaun vasina kontra Covid-19 nian mak Ministra Saúde Sra. Odete Maria Freitas Belo no Viseministru Saúde Dr. Bonifacio Maucoli dos Reis.

Iha intervensaun, Ministra haktuir katak vasina sei ba ema hotu ho gratuita no planu sei hala'o ba lote rihun 24 dahuluk tanba iha pakote vasina nian ne'ebé iha ona sei abranje de'it populasan 20%, tuir Mekanizmu COVAX nian.

Governu daudaun ne'e halo hela esforsu hotu-hotu atu hetan restu 80% husi vasina ne'e, hodi kumpre objetivu atu imuniza populasan tomak to'o tinan 2021 nia rohan no tanba ne'e etapa tuir mai sei sei kontinua ba ema hotu ne'ebé elizível tuir rekezitu médiku, obrigadu tenke hetan vasina hotu.

Entretantu deputadu sira barak mak konkorda ho planu vasina ne'e no husu atu Governu tenke aselera prosesu vasina hodi bele halo prevensaun ba transmisaun lokál ne'ebé grave iha comunidade. Maibé deputadu sira mós rekomenda atu labele atualiza dados sira iha rai li'ur kona-ba risku sira kuandu vasina aimoruk Astrazaneca no husu

atu bele mós iha opsaun sira seluk hodi hetan aimoruk vasina ho marka seluk ne'ebé agora husi nasaun sira seluk halo hela promosaun.

Iha votasaun ba pedidu prióridade no urjénsia ba Proposta Lei nú.32/V (3^a) Primeira alterasaun ba Lei Nú.14/2020 kona-ba Orsamentu Jertál Estadu 2021. Rezultadu votasan afavór 39, kontra 0 no abstain 14 husi total deputadu ne'ebé marka prezensa hamutuk na'in 53.

2) 20 Abril 2021

Parlamentu Nasionál iha 20 Abril 2021, liuhusi reuniaun plenária hahú halo diskusaun no votasaun iha jeneralidade ba proposta lei ne'ebé aprova alterasaun dahuluk ba Lei Nú. 14/2020 kona-ba Orsamentu Jerál Estatu 2021.

Rezultadu aprovasaun iha votasaun jeneralidade ho votu afavór 44, kontra 0 no absteinsaun 21 husi total deputadu sira presente na'in 65.

Estrutura alterasaun ida-ne'e, rezulta despeza konsolidada sira husi Setór Públiku Administrativu nian sa'e ba millaun US\$2.165,1, no reseita sira husi órgaun no servisu sira Administrasaun Sentrá nian sa'e ba millaun US\$1.932,5. Orsamentu sira husi Rejiaun Administrativa Espesiál Oekusi Ambenu nian no orsamentu Seguransa Sosiál nian la iha alterasaun.

Proposta Lei Nú.34/V/3a Alterasaun Dahuluk ba Lei Nú. 14/2020 kona-ba Orsamentu Jerál Estatu 2021 mai ho razaun atu reforsa prevensaun ba pandemia Covid-19. Montante orsamentu retifikativu ne'ebé Governu submete hamutuk miliaun US\$223,8.00 no husi montante ida ne'e, milliaun US\$89,00 sei halo ezersísiu ba ajusta de'it OJE 2021 no husu aumentu tan mak miliaun US\$135,3.00.

Proposta ne'e aprovalu iha votasaun jeneralidade ho votu afavór 44, kontra 0 no absteinsaun 21 husi total deputadu sira presente na'in 65¹.

Fundu Covid-19 ne'e sei reforsa hodi finansia medida prinsipál neen kona-ba intervensaun nian, ne'ebé Governu prepara ona, hanesan: 1) apoiu ba empregu; 2) moratória sira kréditu nian; 3) apoiu ba estudante sira; 4) seguransa ai-han; 5) apoiu ba profesionál sira liña oin nian; 6) prevensaun no mitigasaun ba Covid-19.

Iha intervensaun bankada sira iha debate jeneralidade ba proposta alterasaun ne'e, deputadu sira husu atu halo alterasaun hodi inklui mós aumentu sira iha orsamentu ba verba Fundu Kontijénsia ho kategoria emerjénsia atu bele hatan ba estragu sira husi

¹ Bele asesu iha website JSMP: https://jsmp.tl/wp-content/uploads/PrJSMPhusubaPNDiskuteAsuntulImportante_TETUM.pdf

inundasaun ka kalamidade públiku ne'ebé comunidade foin hasoru iha loron 04 Abril 2021 liuba.

Observasaun JSMP ba dikusaun alterasaun Lei OJE 2021

Parlamentu Nasionál iha 21 Abril 2021, liuhusi reuniaun plenária halo diskusaun no votasaun iha especialidade ba Proposta Lei ne'ebé aprova alterasaun dahuluk ba Lei Nú. 14/2020 kona-ba Orsamentu Jerál Estatu 2021.

Durante observasaun JSMP iha diskusaun ba orsamentu retifikativu, nota katak deputadu sira hasai liafuan sira hanesan “taka rádiu aat, lalikan ko'alia no diskute ona, mai vota de'it ona, frustadu, no asaltu podér, Ministru no Sekretáriu Estadu laiha funsaun no liafuan selu-seluktan” ne'ebé la apropriadu no provokativu.

JSMP preokupa ho deputadu sira ne'ebé hasai liafuan sira ne'ebé la apropriadu no provokativu no di'ak liu sira atu fokus de'it ba diskusaun ba iha orsamentu ne'e nia konteúdu atu bele fó solusaun di'ak ba rezolve problema povu no nasaun ne'ebé enfrenta hela relativamente situasaun kalamidade públiku hanesan dezastre naturál no pandemia Covid-19.

JSMP dala barak ona kestiona prátika no atitude hirak ne'e liuhusi JSMP nia relatóriu anuál nune'e mós iha komunikadu imprensa sira, maibé deputadu sira kontinua ignora regra sira no prosedimentu sira ne'ebé aplika iha PN.

Durante ne'e, deputadu barak mak hala'o sira-nia knaar iha reuniaun plenaria la halo tuir sira-nia devér sira ne'ebé konsagra iha provizaun Artigu 10 Rejimentu Parlamentu nian, liuliu provizaun pontu 2) Artigu 10 nian ne'e. Iha provizaun alinea a) pontu 2) prevee katak respeita dignidade Parlamentu Nasionál no deputadu sira nian, alinea b) pontu 2) prevee katak halo tuir orden no dixiplina sira iha Rejimentu no hatudu respeito ba autoridade Prezidente Parlamentu no iha alinea c) pontu 2) prevee katak kontribui liuhusi “halalok” deputadu sira-nian ba efikásia no prestíjiu serbisu sira Parlamentu nian. Nune'e, JSMP haree katak hahalok deputadu sira nian ne'e la tuir sira-nia devér ne'ebé Rejimentu haruka.

JSMP sujere ba Meza Parlamentu, partikularmente Prezidente Parlamentu atu bele uza nia kompeténsia tuir Rejimentu Parlamentu nian hodi jere ho di'ak diskusaun no hapara tiha intervensaun deputadu sira ne'ebé fora ka ses husi asuntu sira ne'ebé guia deputadu sira hodi diskute. Nune'e mós bele halo kedas xamada atensaun ba deputadu ne'ebé halo intervensaun la tuir Rejimentu ka viola ona Rejimentu Parlamentu nian, atu bele prevene deputadu sira hatudu hahalok hanesan iha plenária.

3) 21 Abril 2021

Iha 21 Abril 2021, deputadu Parlamentu Nasionál kontinua plenária hodi halo diskusaun no votasaun iha especialidade ba Proposta Lei ne'ebé aprova alterasaun dahuluk ba Lei Nú. 14/2020 kona-ba Orsamentu Jerál Estatu 2021.

Iha loron dahuluk diskusaun especialidade ne'ebé prezide husi Prezidente Parlamentu Nasionál no hetan partisipasaun másimu husi membru Governu sira ne'ebé lideradu husi Primeiru Ministru ho membru Governu sira. Parlamentu Nasionál kontinua holo diskusaun no aprovasaun iha especialidade ba Kapítulu I kona-ba dispozisaun inisiál ne'ebé define kona-ba objetivu no âmbito alterasaun orsamentu nian mak apoiu prevensaun Covid-19 no apoiu inundasaun no aprova mendida sira apoiu sosioekonomia.

Aprova mós proposta alterasaun número 1 no 2 Artigu 1 kona-ba artigu sira ne'ebé sofre alterasaun, Artigu 2 kona-ba Rejime Financeira iha pontu 3 no 4 ne'ebé define kona-ba efeito sira husi número anteriór ba serbisu iha órgaun sira ne'ebé sein outonomia financeira no goja nia direitu husi fundu outonomia financeira ho administrsaun direita.

Alende ne'e, deputadu sira mós aprova aneksu I tabela I kona-ba Reseitas no Despeza sira Setór Públiku Administrativu no Tabela II kona-ba Reseitas órgaun sira Serbisu Administrasaun Sentráal no aprova mós orsamentu Parlamentu Nasionál, Ministériu Asuntu Parlamentár no Komunikasaun Sosiál no Ministériu Justisa ho mós proposta alterasaun sira ne'ebé pasa iha votasaun hamutuk 8.

Iha diskusaun no aprovasaun ne'e proposta alterasaun 8 mak la pasa, proposta mai husi bankada opozisaun hodi husu atu muda orsamentu husi Gabinete Primeru Ministru, Prezidénsia Konsellu Ministru no Ministériu Asuntu Parlamentár no Komunikasaun Sosiál iha verba Governasaun no Jestaun Institusionál nian ba iha Programa Prevensaun no Mitigasaun Covid-19 no aumenta osan Sekretáriu Estadu Igualdade Jéneru hodi apoiu ba programa prevensaun violénsia Jéneru.

Diskusaun sira ne'e prezide husi Prezidente Parlamentu Nasionál no hahú ho leitura husi Sekretáriu Meza no justifikasaun Governu ba proposta inisiál no justifiksaun husi deputadu proponente ba proposta alterasaun sira.

Proposta sira ne'ebé la pasa iha votasaun especialidade tuir JSMP nia observasaun ba proposta hirak ne'e mai husi partidu opozisaun CNRT ho PD.

4) 22 Abril 2021

Parlamentu Nasionál iha 22 Abril 2021, kontinua halo diskusaun no votasaun iha especialidade ba proposta lei ne'ebé aprova orsamentu sira iha Aneksu I Tabela II

kona-ba Reseitas órgaun sira serbisu Administrasaun Sentrál alterasaun dahuluk ba Lei Nú. 14/2020 kona-ba Orsamentu Jerál Estadu 2021.

Proposta inisiál husi orsamentu sira ne'ebé deputadu sira diskute no aprova iha loron daruak diskusaun epesialidade nian mak verba sira kona-ba dotasaun *todo Governo*, Ministériu Saúde, Ministériu Edukasaun, Juventude no Desportu, Ministériu ba Asuntu Kombatente Libertasaun Nasionál, Ministériu Obras Públikas, Ministériu Transportes no Komunikasaun, Ministériu Agrikultura no Peskas, Ministériu Defeza, Administrasaun Munisipál, Fundu Covid-19, Fundu Infrestrutura, Ospital Nasionál Guido Valadares no Universidade Nasionál Timor Loresa'e (UNTIL).

Proposta alterasaun sira ba proposta inisiál sira ne'ebé deputadu proponente sira propoin no diskute hodi aprova hamutuk 28 no pasa iha votasaun hamutuk 25 enkuantu proposta 3 mak la pasa.

Orsamentu husi proposta 3 ne'ebé la pasa, proponente sira husi partidu PD no CNRT foti fundu kategoria transferénsia públiku iha programa boa-governasaun husi Ministériu Obras Pública no Autoridade RAEOA-ZEEMS iha item Ró HAKSOLOK nian ne'ebé iha previzaun sei la gastu hodi muda ba iha orsamentu programa kontejénsia nian no programa prevensaun no mitigasaun ba Covid-19 no mós transferénsia públiku.

Entretantu proposta sira ne'ebé pasa ona mai husi proponente deputadu sira husi partidu Fretilin, PLP no KHUNTO hodi altera proposta inisiál husi Governu nian ba programa fundu kontejénsia (dotsaun *todo Governo*) no programa prevensaun no mitigasaun ba Covid-19

Ministériu hirak ne'ebé sofre alterasaun ba orsamentu iha diskusaun no aprovasaun loron daruak nian mak Ministériu Saúde, Ministériu Edukasaun, Juventude no Desportu, Ministériu ba Asuntu Kombatente Libertasaun Nasionál, Ministériu Obras Públikas, Ministériu Transportes no Komunikasaun, Ministériu Agrikultura no Peskas, Ministériu Defeza, Administrasaun Munisipál, Fundu Covid-19, Fundu Infrestrutura, Ospital Nasionál Guido Valadares.

5) 23 Abril 2021

Parlamentu Nasionál, iha 23 Abril 2021 liuhusi reuniaun plenária extra-ordináriu halo diskusaun no votasaun iha epesialidade no finál globál ba proposta lei ne'ebé aprova alterasaun dahuluk ba Lei Nú. 14/2020 kona-ba Orsamentu Jerál Estadu 2021.

Iha diskusaun no votasaun sira iha epesialidade, deputadu sira kontinua diskute no aprova proposta sira iha aneksu I tabela orsamentál iha Tabela II kona-ba Reseitas husi órgaun sira iha Serbisu Administrasaun Sentrál no Aneksu II kona-ba Republikasaun ba Lei Nú.14/2020 kona-ba Orsamentu Jerál Estadu 2021, Tabela I kona-ba Reseitas no

Despeza iha Setór Públiku Administrativu, Tabela II kona-ba reseitas husi órgaun sira iha servisu Administrasaun Sentráal no Tabela III kona-ba Despeza ba órgaun Administrasaun Sentráal ho nia Aneksu sira iha Lei Nú. 14/2020 ne'ebé prosede alterasaun konforme nia redusaun ne'ebé konstante iha Aneksu iha Lei ida ne'e nian.

Totál proposta 31 mak deputadu sira aprova iha loron datoluk diskusaun altersaun ba Orsamentu Jerál Estadu ne'ebé introdús kona-ba medida sira kona-ba implementasaun subsídiu sira ba estudante, moratóriu ba kreditur sira, diferimentu obrigsaun debedór sira-nian no mós medida sira apoiu estudante no medida sira seguransa alimentár.

Hafoin remata iha diskusaun no aprovasaun iha especialidade, Parlamentu Nasionál submete kedas proposta lei ne'e ba iha votasaun finál global ho rezultadu votu aprovasaun afavór 44, kontra 0 no abstein 20.

Alterasaun orsamentu ne'e fahe ba fundu rua mak hanesan fundu ba prevensaun no mitigasaun Covid-19 no Fundu Kontejénsia hodi finansia estragu sira ne'ebé impaktu husi kalamidade públiku (inundasaun).

Dotasaun Fundu Covid-19 ho montante milliaun US\$31.000.000, hetan ona aumentu ho montante milliaun US\$256.641.793 ho nune'e ninia totál hamutuk milliaun US\$287.641.793.

Entretantu, iha parte dotasaun ba Fundu Kontinjénsia ne'ebé uluk ho montante milliaun US\$23.763.372 ho aumentu ho nia orsamentu milliaun US\$41.388.428 sa'e ba montante milliaun US\$65.151.800.

Orsamentu retifikativu ne'e ho nia finalidade atu finansia despeza sira iha serbisu prevensaun no kombate pandemia Covid-19, nune'e mós adota medida sira mitigasaun ba ninia impaktu ekonómiku. Nune'e, ho alterasaun ida-ne'e, iha Fundu COVID-19 sei reforsa hodi finansia medida prinsipál hanesan apoiu ba empregu, moratória sira kréditu nian, apoiu ba estudante sira, seguransa ai-han, apoiu ba profesionál sira liña oin no apoiu ba prevensaun no mitigasaun ba Covid-19.

Enkuantu iha parte kalamidade públika nian ho alterasaun ne'e mós introdús orsamentu ne'e, liuhusi reforsu Fundu Reserva Kontinjénsia nian hodi hatán ba dezafiu sira ne'ebé kauza husi inundasaun ka kalamidade públiku ne'ebé akontese ona iha 04 Abril 2021 liuba.

Rekomendasaun JSMP ba alterasaun Lei OJE 2021

JSMP konsidera fundu rua ne'ebé Parlamentu aprova ne'e importante no urjente atu bele finansia programa Governu iha serbisu prevensaun no kombate Covid-19, hadi'a ekonomia povu no setór privadu nian ne'ebé afetadu husi pandemia Covid-19 no

inundasaun. Nune'e, JSMP husu ba Governu no entidade competente sira atu bele asegura ezekusaun orsamentu ne'e ho transparente no akontável tuir lei.

Relasiona ho ezekusaun orsamentu ida ne'ebé di'ak, transparente no akontável, JSMP husu ba entidade competente sira hanesan Parlamentu Nasionál no Komisaun Anti Korrupsaun (KAK) atu halo kontrolu másimu hodi asegura ezekusaun orsamentu ne'e tuir lei no iha efetividade iha kombat Covid-19 no apoiu comunidade no setór privadu sira ne'ebé afetadu husi kalamidade públiku no hadi'a infrestrutura sira ne'ebé at rezulta husi inundasaun.

Atu asegura supervizaun ka kontrolu ida ne'ebé di'ak no efetivu, JSMP sujere atu Parlamentu Nasionál atu kria Komisaun Eventuál ida atu bele fokus fiskaliza ezekusaun orsamentu ne'e.

JSMP husu mós ba Komisaun Anti Korrupsaun (KAK) atu estabeselese ekipa "task force" ida ne'ebé nia membru sira bele kompostu husi instituisaun relevante sira hodi taumatan ba asegura ezekusaun orsamentu ida ne'e ho transparánsia no akontablidade².

6) 27 Abril 2021

Iha Tersa-feira 27 Abril 2021 Parlamentu Nasionál kontinua hala'o reuniaun plenária ho agenda diskusuan iha períodu *antes ordem do dia* mak kona-ba lee pedidu justifikasaun falta sira husi deputadu nian.

Iha agenda tuir fali mak deputadu sira fó votu pesár ba Vítima Ciclone Tropical Seroja no mós vítima Ró submariñu KRI Nanggala 402, Indonezia.

Votu pesár aprovalu ho votu afavór 38, kontra 0 no absteinsaun 1 husi totál deputadu na'in 39 ne'ebé marka prezensa iha reuniaun plenaria ne'e.

Alende ne'e mós, deputadu sira husi Komisaun F ne'ebé trata asuntu Eduksaun, Juventude, Kultura no Sidadania apresenta sira nia relatóriu vizita fiskalizacion ba munisípiu Likisá iha 24 to'o 25 Feveireiru 2021.

Iha relatóriu ne'e deskreve kona-ba Komisaun nia dekoibrimentu sira ho nia rekomendasaun sira mak hanesan tuir mai ne'e : kondisaun eskola ne'ebé la di'ak no prezisa antensaun. Kondisaun sira ne'e mak hanesan; kondisaun infrestrutura eskola, fasilidade ba estudante no profesór sira menus, prosesu aprendijazen no rekursu umanu prezisa hadi'ak no aumenta, implementasaun kuríkulu prezisa hadi'ak,

² Bele asesu info ne'e iha website JSMP: https://jsmp.tl/wp-content/uploads/ProrsamenturetifikativuFundoCOVID-19_TETUM.pdf

administrasaun no jestaun eskola presiza hadi'a, rekrutamentu profesór sira no arte kultura presiza tau matan.

Relatóriu ne'e apresenta husi relatóriu deputadu Domingos dos Santos ne'ebé akompañia husi Prezidente Komisaun F deputadu Antonio Verdial.

Intervensaun diversu

Iha intervensaun diversu, deputadu sira kestiona kona-ba asuntu sira bee no saniamentu ne'ebé sei falta iha Dili laran no mós iha teritóriu nasionál, asuntu refuizadu sira ne'ebé afetadu husi kalamidade públiku iha dia 4 Abril 2021 presiza hetan atensaun masímu husi Governu, aplikasaun serka sanitáriu no konfinamentu abrigatoriu presiza estabelese meu ida ne'ebé apropriadu atu labele afeta ba povu nia vida moris.

Alende ne'e asuntu kona-ba infrestrutura ne'ebé aat tanba inundasaun, husu ba Governu atu tau atensaun másimu hodi bele hadi'a ho urjentimente atu bele fasilita comunidade sira halo viazen ba mai. Estrada sira ne'e, balun mak hanesan estrada Aileu parte Sarlala, Remexiu no mós Lahane Dili. Asuntu seluk ne'ebé deputadu sira kestiona mós maka asuntu saúde nian ne'ebé presiza iha atensaun urjente mak falta aimoruk iha ospitál sira, oksijénia no ekipamentu medikamentu iha óspitál nasionál no ospitál sira seluk inklui sentru saúde sira no mós aimoruk iha apotik folin sa'e.

Entretantu, asuntu ikus liu mak deputadu sira kestiona kona-ba kazu agresaun fizika husi guarda prizaun ba prizioneiru sira iha prizaun Suai ne'ebé keixa ona mai entidade relevante sira inklui PDHJ atu tau matan no saláriu ba funsionáriu gurda florestál sira iha Parke Nasionál Nino Koni Santana ne'ebé to'o agora seidak simu sira-nia saláriu.

Informasaun husi Ministru Asuntu Parlamentar no Komunikasaun Sosiál Sr. Francisco Jeronimo iha nia intervensaun haktuir katak aplikasaun serka sanitaria no konfinamentu obrigatóriu iha fatin sira ne'ebé afetadu Covid-19, Governu kontinua nafatin garantia atu fasilita sirkulasaun transporte no ekonomia kontinua la'ó ho normál. Maibé obrigatoriamente comunidade sira tenke kumpri nafatin regra sira ne'ebé Governu aplika ka dekreta ona nu'udar meu ida atu ita bele hapara transmisaun lokál.

Entretantu informasaun seluk ne'ebé deputadu sira mensiona, nia parte sei anota hela hodi enkamina ba instituisaun ka ministériu relevante sira hodi bele hatan pur eskrita ka oralmente.

Iha agenda *ordem do dia*, deputadu sira hala'ó diskusaun no votasaun ba iha jeneralidade ba Projetu Lei Nú. 25/V/3^a kona-ba Prosede Alterasaun dahuluk ba Lei Nú.11/2017 kona-ba Lei Imigrasaun no Asíliu.

Rezultadu aprovasaun ba proposta refere ho votu afavór 48, kontra 0 no abstain 5 husi deputadu bankada opozisaun.

Proposta Alterasaun ne'e baixa kedas ba iha Komisaun B ne'ebé trata asuntu Defeza no Seguransa no mós Negósiu Estranjeiru hodi bele prosede ba diskusaun iha especialidade ho nia durasaun tempu másimu semana ida.

Konteúdu husi materia alterasaun ne'e kona-ba akordu internasional entre Santa Sé ho Timor-Leste kona-ba vistu ba misionáriu Igreja Katólíka nian sira ne'ebé hala'o nia misaun iha Timor -Leste ne'ebé iha kontinuadu. Alterasaun ba Artigu 59 hodi prosede alternativa foun ba misionáriu sira atu bele halo vistu durante tinan lima no bele renova tinan lima filafali depois bele hela permanente ona iha Timor-Leste.

Aprezentasaun informasaun anuál 2020 Ministériu Públiku

Prokuradór Jeral Repúblika Dr. Jose Ximenes, iha 27 Abril 2021 liuhusi reuniaun plenária halo mós prezentsaun informasaun anuál 2020 husi Ministériu Públiku nian kona-ba progresu serbisu, dezafiu no susesu sira ne'ebé Ministériu Públiku hasoru durante tinan 2020.

Aumezmu tempu hanesan Prokuradór Jerál Repúblika, hato'o mós serbisu sira ne'ebé durante nia mandatu halo ona no ida ne'ebé seidak halo no hirak ne'ebé presiza iha nia kontinuasaun.

Iha nia apresentasaun nia haktuir progresu kazu sira iha inísiu nia kaer knaar nu'udar Prokuradór Jerál Repúblika iha tinan 2013 iha majistradu hamutuk na'in 13 no ohin ho apoiu Sentru Formasaun Juridíku número Ministériu Públiku iha majistradu 37 no Ofisiál Justisa ne'ebé uluk na'in 40 agora sa'e ba na'in 95.

Entretantu iha tinan 2013 nu'udar Prokuradór Jerál Repúblika simu kazu iha primeiru mandatu ho total kazu pendente hamutuk 5006 iha nivél nasional no durante tinan haat dahuluk konsege prosesu kazu hamutuk 15,000 no pendente hamutuk kazu 2,241. Enkuantu iha segundu mandatu nu'udar Prokuradór Jeral Repúblika simu kazu ho total rihun 21 ne'ebé to'o iha Marsu 2021 kazu sira ne'e hela de'it 2,652.

Prokuradór Jerál Repúblika mós haktuir katak kazu ne'ebé iha ona faze prosesu no rejistu iha Ministériu Públiku agora hamutuk 2,700.

Alende ne'e, apresenta mós progresu seluk ne'ebé durante tinan 2020 atinjé ona liuliu ligadu ho progresu ba finaliza kazu pendente sira no mós kazu foun durante tinan 2020 ne'ebé prokuradór distritál sira hanesan Suai, Oekusi, Dili, Baukau no Gabinetei Kombate Krime Organizadu no Korrupsaun prosesa.

Progresu konstrusaun ba edifísiu foun Ministériu públiku nian iha Lospalos-Lautein no edifísiu ba Gabinete Sentrái Kombate Korrupsaun no Kriminalidade Organizadu ne'ebé sei iha hela faze konstrusaun no sei finaliza iha tinan 2021 ne'e nia laran tanba

ne'e tenke iha nia kontinuasaun atu mantein atensaun ba progresu edifísio hirak ne'e hodi konklui tur nia tempu ne'ebé determinadu ona.

Iha inseramentu ba debate Prokurador Jerál Repúblika, Dr. Jose Ximenes hato'o mós agradesimentu ba entidade hotu nia konfiansa durante nia mandatu.

Iha deputadu sira nia intervensaun, hato'o agradece barak ba Dr. Jose Ximenes nia kontribuisaun durante ne'e iha setór justisa no liuliu iha Ministériu Públiku no espera bele susesu nafatin atu kontinua tulun setór justisa iha Timor-Leste.

7) 28 Abril 2021

Iha 28 Abril 2021, Parlamentu Nasionál liuhosi reuniaun plenária extra-ordinária, kontinua halo diskusaun no aprovasaun iha agenda kona-ba pedidu Prezidente Repúblika hodi dektreta autorizasaun ba renovasaun deklarasaun Estadu Emerjénsia ba 12 ne'ebé sei hahú husi tuku 00:00 lora 03 Maiu to'o iha tuku 23:59 lora 01 Juñu 2021.

Iha intervensaun Vise-Primeiru-Ministru no Ministru Planu no Ordenamentu, Sr. José Maria dos Reis, iha abertura debate iha Parlamentu Nasionál kona-ba autorizasaun ba renovasaun deklarasaun Estadu Emerjénsia nian, apela ba públiku atu iha uniaun husi ema hotu-hotu, sidadaun hotu-hotu, forsa polítika hotu-hotu, empreza, organizaun naun governamentál nian sira, parseiru internasionál no husi entidade oioin sira ne'ebé atua nível públiku no privadu iha objetivu komún atu luta kontra Covid-19 no harii filafali País.

Governu konsidera situasaun ida ne'e liu fali ida uluk nian, ida-ne'e maka momentu, atu hamutuk, ho forma solidária no inkluziva, sein husik ema ida ba kotuk, hodi kumpre devér sidadania nian, atu tulun sira ne'ebé presiza liu, no sira ne'ebé mikit liu, vulnerável no sira ne'ebé maka ema la tau-matan, liuliu vítima sira no sira rihun ba rihun ne'ebé daudaun ne'e hela hamutuk iha sentru akolliamentu nian no presiza ita-nia apoiu hodi hahú fali sira-nia moris.

Ukun-na'in ne'e husu ba hotu-hotu atu kontinua "kolabora liuhusi asaun individuál no koletiva sira liuhusi uza máskara, distansiamentu sosiál, fase liman, evita halibur malu", liuliu iha momentu ida-ne'e, iha ne'ebé ita "rejista iha semana rua ikus ne'e aumentu drástiku kazu pozitivu sira", ho "prevalénsia atuál kazu 7,1%, ho número boot liu iha kapitál Dili ne'ebé, iha lora hirak ikus ne'e, oficialmente konsideradu hanesan kazu Tranzmisaun Komunitária, ho possibilidade ne'ebé eziste ema besik rihun 20 mak infetada iha Dili (iha ne'ebé husi número ne'e ema 1600 resin de'it maka identifikadu ona to'o ohin lora)".

Nia mós deklara ba públiku louvór no omenajen” ba traballadór liña oin sira, no hato’o mós ba sira “agradesimentu ne’ebé kle’an husi Governu no Timoroan hotu-hotu”.

Ukun Na’in ne’e dehan mós katak Governu sei kontinua serbisu maka’as hodi alkansa ema hotu-hotu nia objetivu boot: vasinasaun koletiva, sira ne’ebé ninia hakarak maka simu vasina, pelumenus, 80% husi populasau to’o tinan 2021 nian rohan.

Governu ne’e sei kontinua mós “luta, hamutuk ho sidadaun hotu-hotu, atu permite katak ita bele planeia, atu iha tempu besik nia laran, progresu ida, tuir faze, ba normalidade foun ida, iha período foun Pós-Covid-19 nian ida, período progresu no prosperidade nian”.

Ho “medida sira ne’ebé, tanba haree liu ba ema sira kona-ba lori sira ba hela iha hela-fatin ne’ebé dignu, ne’ebé harii iha fatin seguru, bele kombina ho servisu públiku esensial sira ne’ebé di’ak liu iha saúde, edukasaun no asesu ba eletrisidade, bee, saneamentu no seguransa sosiál” no “medida sira ne’ebé valoriza edukasaun, formasaun no informasaun ba ema sira, bele kontribui liután ba kapasitasaun no abilitasaun sidadaun sira ne’ebé maka reziliente liu no preparadu atu hasoru krize, kalamidade no emerjénsia sira, agora no iha futuru”. Rezultadu votasaun ba Lei Nú. 7/2021 de 28 de Abril, Autorizasaun renovasaun deklarasaun Estadu Emerjénsia aprovalu iha Parlamentu Nasionál ho votu a favor 43, kontra 0 no abstain 16.

Reuniaun Komisaun A

Komisaun A, Parlamentu Nasionál iha Abril halo audénsia no reuniaun sira hamutuk rua.

Ajenda reuniaun Komisaun A nian mak halo aprovasaun ba relatóriu paraser kona-ba Proposta no Projeitu Lei Estatutu Ministériu Públiku, aprova paraser kona-ba proposta segunda alterasaun ba Lei Divizaun Administrasaun Teritóriu no aprovasaun ba relatóriu paraser kona-ba projeitu lei ne’ebe prosede alterasaun ba Lei Imigrasaun no Asíliu.

Entretantu ajenda ba audénsia nian mak; Komisaun A halo audénsia pública ho Ministru Justisa, Defensória Pública, Prokuradór-Jerál Repúblika, Eis Ministra Justisa e Eis Prokuradór Jerál Repúblika, Prezidente Tribunál Rekursu (PTR), JSMP no Dr. Jorge Graça nu’udar eis- koordinadór Komisaun Reforma Judisiáriu no Reforma Lezislativu ho nia objetivu atu rona hanoin sira kona-ba esbosu Lei Organizasaun Judisiária no proposta alterasaun ba Lei Nú. 28/V(3a) kona-ba Organizasaun no Funsionamentu Tribunál nian.

Diskrisaun ba informasaun kompletu kona-ba rezultadu sira husi reuniaun Komisaun A nian mak hanesan tuir mai ne'e:

1) 07 Abril 2021

Komisaun A, Parlamentu Nasional iha 07 Abril 2021, liuhusi reuniaun komisaun nian halo aprovasaun ba relatóriu paraser sira mak hanesan relatóriu paraser kona-ba Proposta no Projetu Lei Estatutu Ministériu Públiku, aprova paraser kona-ba proposta segunda alterasaun ba Lei Divizaun Administrasaun Teritóriu no relatóriu paraser kona-ba projetu lei ne'ebé prosede alterasaun ba Lei Imigrasaun no Asiliu.

Parase proposta no projetu Lei Estatutu Ministériu Públiku

Paraser ba projeitu alterasaun Lei Nú 23/V/3 no proposta alterasaun ba Lei Nú 24/V/3 kona-ba Estatutu Ministériu Públiku nia rezultadu votasaun aprova ho votu sira afavór 5, kontra 1 no abstein 2, vota kontra mak deputadu Arao Noe no vota abstein mak deputadu Carmelita C. Moniz no Patrocino Fernandes dos Reis.

Konteúdu husi relatóriu paraser kona-ba Estatutu Ministériu Públiku nian ne'e inklui mós rekomendasaun sira husi audénsia JSMP ho Komisaun A no mós iha aprovasaun ba relatóriu ne'e inklui ho testu substitutivu ida ne'ebé akomoda esbosu lei rua ne'e hamutuk hodi submete hamutuk ho relatóriu paraser mai Meza Parlamentu Nasionál atu diskute no aprova iha jeneralidade.

Testu substitutivu ba esbosu lei foun ne'e nia proponente mai husi deputadu Prezidente Komisaun A, distintu deputadu Joaquim dos Santos.

Paraser alterasaun ba Lei Divizaun Administrasaun Teritóriu

Paraser ba proposta segunda alterasaun ba Lei Divizaun Administrasaun Teritóriu iha nia rezultadu votasaun aprova ho votu afavór 8, kontra 0 no abstein 0.

Iha rekomendasaun ba proposta ne'e iha diskusaun mak rekomenda atu aplikasaun lei ne'e iha entrada iha vigór iha tinan fiskál foun 2022 atu nune'e bele inklui nia orsamentu iha Lei Orsamentu Jeral Estadu 2022.

Deputadu sira mos rekomenda ba Governu atu kria rejime tranzitória ida ne'e ba Atauro ne'ebé atu sai Munisípiu hodi bele fasilita tranzisaun podér ho di'ak no preparadu antes sai Munisípiu.

Paraser alterasaun ba Lei Imigrasaun no Asiliu

Iha nia rezultadu votasaun ba paraser kona-ba projetu segunda alterasaun ba Lei Imigrasaun no Asiliu aprova ho votu sira afavór 8, kontra 0 no abstein 0.

Alterasaun ne'e ligadu ho akordu internasionál entre Santa Sé ho Timor-Leste kona-ba vistu ba misionáriu Igreja Katólíka nian sira ne'ebé hala'o nia misaun iha Timor-Leste ne'ebé iha kontinuasaun. Alterasaun ba Artigu 59 hodi prosede alternativa foun ba misionáriu sira atu bele halo vistu durante tinan lima no bele renova tinan lima filafali depois bele hela permanente ona iha Timor-Leste.

Entretantu iha diskusaun ba paraser ne'e, deputadu sira konkorda hodi muda ba tinan lima de'it no la bele renova tan ba tinan lima nu'udar kompromísu obrigatóriu ba akordu serbisu antre Timor-Leste ho Santa Sé ne'ebé ratifikadu ona iha tinan hirak liuba iha PN.

2) 08 Abril 2021

Komisaun A Parlamentu Nasionál (PN), iha 08 Abril 2021, hala'o audénsia pública ho Ministru Justisa, Defensória Pública, Prokuradór-Jerál Repúblika, Eis Ministra Justisa e Eis Prokuradór Jerál Repúblika, Prezidente Tribunál Rekursu (PTR), JSMP no Dr. Jorge Graça nu'udar eis- koordenadór Komisaun Reforma Lezislativu no Setór Justisa ho nia objetivu atu rona hanoin sira kona-ba esbosu Lei Organizasaun Judisiária no Proposta alterasaun Lei Nú. 28/V(3a) kona-ba Organizasaun no Funsionamentu Tribunál nian.

Iha introdusaun ba materia, Prezidente Komisaun A, distintu deputadu Sr. Joaquim dos Santos " Boroluli" haktuir katak inisiativa hamosu projetu no proposta lei ne'e tanba atu introdús sistema judisiáriu foun ne'ebé harii no hahú nia knaar hodi responde ba mandatáriu Konstituisaun nian ne'ebé hatur ona iha Artigu 163 número 2 kona-ba Organizasaun Judisiáriu ne'ebé iha Timór-Leste laran bainhira Lei-Inan ne'e tama iha vigór sei la'o nafatin to'o bainhira sistema judisiáriu foun harii no hahú nia knaar.

Iha audénsia ne'e JSMP apresia tebes ba serbisu no esforsu Parlamentu Nasionál nian partikularmente ba Komisaun A no Governu ne'ebé tau ona prioridade hodi inisia proposta no projetu lei rua ne'e hodi aselera ona diskusaun ba lei refere. Ida ne'e, nu'udar pasu ida pozitivu ba Timor-Leste atu bele iha rasik nia lei ne'ebé sei regula funsionamentu sistema judisiáriu.

Durante ne'e funsionamentu tribunál sira iha Timor-Leste bazeia de'it ba iha Regulamentu UNTAET Nú.11/2000, 06 Marsu ne'ebé alteradu ho Regulamentu Nú.25/2001 hodi introdús kona-ba organizasaun judisiáriu iha Timor-Leste kona-ba fahe tribunál sira ba distritu 4 mak hanesan Tribunal Distritál Baukau, Dili, Oekusi-Ambeno no Suai. Alende ne'e, inklui mós diploma no norma sira ne'ebé regula konaba estatutu profisionál sira setór judisiáriu nian, partikularmente, majistradu juis, majistradu Ministériu Públiku, agente Defensoria Pública, Advogadu Privadu no mós buat esensiál sira seluk ne'ebé bele fó suporta ba funsionamentu administrasaun justisa nian iha Timor-Leste.

JSMP hanoin katak importante tebes lezislador sira atu rona hanoin sira husi entidade relevante sira atu fó sira nia apresiasaun kle'an ba esbosu lei rua ne'e hodi nune'e bele hamosu hanoin ida ne'ebé refletivu ba hadi'ak liutan lei ne'e hodi bele responde no refléta duni situasaun real ne'ebé autór judisiáriu sira enfrenta no nesesita.

Iha apresentasaun, JSMP introdús kona-ba importante husi lei ne'e mak oinsá mak bele harii metin ai-rin tolu ne'ebé iha setór judisiáriu ne'ebé iha nia serbisu iha nia interdependénsia ba malu tantu Tribunál, Ministériu Públiku no Defensoria Pública ho Advogadu Privadu, tanba se laiha ida mak prosesu justisa sei la la'o ka funsiona.

Alende ne'e, JSMP mós subliña atu hadi'a fali título lei, estruturasaun no sistematizasaun lei hodi bele sai organizado, estruturadu no sistematizadu liután. Nune'e, JSMP iha nia paraser eskrita, apresenta mós estrutura alternativu ida. Atu hatene kona-ba estrutura alternativu ne'ebé JSMP rekomenda bele asesu paraser JSMP iha website JSMP nian.

Partisipa iha audénsia ne'e mós Meritísimu Juis Dr. Deolindo dos Santos, Presidente Tribunál Rekursu ne'ebé iha nia intervensaun subliña mós artigu sira ne'ebé regula kona-ba Ministériu Públiku no Defensór Públiku, ofisiál justisa inklui apoiu paralelu ba administrasaun iha tribunál sira atu regula de'it iha sira nia Estatutu.

Entretantu iha enseramentu, Presidente Komisaun A, deputadu Sr. Joaquim dos Santos agradece ba partisipasaun JSMP no Tribunál iha audénsia ne'e no agradece mós tanba iha audénsia ne'e Komisaun A hetan kedas paraser husi JSMP no Tribunál ne'ebé disponível kedas atu bele inklui iha relatóriu Komisaun nian iha futuro.

Konkluzau no rekomendasaun

Atividade reuniaun plenária Parlamentu Nasionál iha Abril 2021, reuniaun plenária continua funsiona normál iha semana dala-ida ho nune'e Parlamentu konsege aprova orsamentu retifikativu 2021 iha finál globál.

Entretantu Komisaun Espesializada sira continua funsiona ho normal hodi konsege realize audénsia ho entidade relevante sira hodi rona sira nia hanoin no opiniaun kona-ba proposta alterasaun ba Lei orsamentu Jerál Estadu 2021. Enkuantu Komisaun A, iha Abril konsege realize audénsia komisaun hamutuk dala rua de'it tanba iha atividade audénsia públiku entre Governu ho Komisaun C no Komisaun Espesializada sira seluk relasiona ho proposta alterasaun ba Lei Orsamentu Jerál Estadu 2021.

Iha diskusaun ba Orsamentu Retifikativu, nota katak deputadu sira hasai liafuan sira hanesan "taka rádiu aat, lalikan ko'alia no diskute ona, mai vota de'it ona, frustadu, no asaltu poder, Ministru no Sekretáriu Estadu laiha funsaun no liafuan selu-seluktan" ne'ebé la apropiadu no provokativu.

Rekomendasaun sira

a) Parlamentu Nasionál

- JSMP husu atu deputadu sira fokus de'it diskusaun ba iha orsamentu ne'e nia konteúdu atu bele fó solusaun di'ak ba rezolve problema povu no nasaun enfrenta hela relativamente situsaun kalamidade públiku hanesan dezastre naturál no pandemia Covid-19 hodi evita trata-malu.
- JSMP husu ba Komisaun A atu bele continua rona hanoin entidade hotu nian inklui sosiedade sivíl iha prosesu lezislasaun sira hodi nune'e bele akumulá hanoin no idea sira hotu hodi hadi'a no dezenvolve lei ne'e ho di'ak liu tan antes lori ba iha diskusaun no aprovasaun iha jeneralidade iha plenária
- JSMP husu ba membru deputadu sira Parlamentu Nasionál atu ezerse sira-nia knaar nafatin observa ka kumpri regra dixiplinár no sira-nia devér sira ne'ebé regula iha Rejimentu Parlamentu Nasionál no lei relevante sira seluk, nune'e bele prezerva dignidade Parlamentu Nasionál no promove efetividade serbisu Parlamentu Nasionál nian.

b) Governu

- Husu ba Governu atu bele haforsa liután medida sira prevensaun no kombate Covid-19 nian liuhusi penaliza sidadaun sira, tantu nasional no internasionál ne'ebé tama-sai ilegál iha liña fronteira sira entre Timor-Leste no Indonézia inklui aplikasaun serka sanitáriu no konfinamentu domisiliáriu obrigatóriu sira. Aktu la kumpri ka halo tuir dispozisaun legál sira ne'ebé autoridade públiku sira hasai, hanesan lei, deketu lei no rezolusaun sira ne'ebé relevante ba Covid-19 konsidera nu'udar krime dezobediénsia ne'ebé prevee iha alinea a) pontu 1) Artigu 244 Kódigu Penál ho pena prizaun to'o tinan 3 ka multa no bainhira nia lei kualifika aktu ne'e hanesan dezobediénsia kualifikada, bele hetan pena prizaun entre tinan 1 to'o 4.